

La classe mesauna porta la pli gronda chargia

Per premias supportablas a las cassas da malsauns

DA LUCAS DEPLAZES / ANR

■ **Santésuisse ha laschè eruir la chargia da las singulas chasadas en Svizra da las premias a las cassas da malsauns. Ils experts han constatà che la classa mesauna porta cun 8,5% la pli gronda chargia finanziaria, i suondan alura las famiglias cun uffants.** En ses pled d'introducziun ha il president dal cussegl d'administraziun da Santésuisse, *Christoffel Brändli*, fatg attent a las diversas intervenziuns politicas en favur da las famiglias sin rucca en il parlament federal. Santésuisse vul contribuir a la discussiun politica cun formular diversas propostas sin il sector da la sanadad publica. Santésuisse ha constatà ch'il princip da solidaritad vegnia mess en dumonda en vista a la gronda chargia da las famiglias. Ina expertisa dal biro per dumondas davart la politica sociala (Bass) a Berna «Reforma da la sanadad – per premias supportablas» demussa che var 30% da las chasadas pajan dapli che 8% da lur entradas disponibilas a las cassas da malsauns.

Solidaritad periclitada

Ils experts han erui la chargia da las premias a las cassas da malsauns per ils divers models da famiglia, che quai saja famiglias tradiziunals cun u senza uffants, chasadas da persunas sulettas e chasadas nua che singulas persunas educeschan persunas uffants. Plinavant han ils specialists analisà las consequen-

zas da las singulas mesiras sco rabats e la reduziun individuala da las premias. En media pajan las singulas chasadas 6,9% da lur entradas a las cassas da malsauns. En questa cumpart èn resguardadas las reduziuns individualas da las premias, prestadas da la confederaziun e dals chantuns. Da talas reduziuns profiteschon 29% da las chasadas (rem.

red: actualmain contribueschan confederaziun e chantuns passa 4 milliardas francs l'onn a la reduziun da las premias per las famiglias e per persunas cun entradas modestas). Per passa 30% da las chasadas munta la cumpart da las premias passa 8% da lur entradas disponibilas. Ina chargia sur la media dad 8% pajan er famiglias cun giuvenils en fur-

maziun. Per famiglias cun uffants pitschens munta la quota 7,4%. Relativamain fetg chargiadas (8%) èn era persunas che retilan l'AVS. Cun 8,5% portan chasadas da la classa mesauna la pli greva chargia per la sanadad publica. Quest segment social profitescha il pli pauc da las contribuziuns dal maun public. Il pli pauc pajan persunas che vivan sulettas

e chasadas senza uffants. Tenor il parairi da Santésuisse periclitgescha ina tala situaziun la solidaritad tranter persunas saunas e malsaunas. Per 40% da las chasadas sajan las premias per la sanadad in problem, han constatà ils experts. Ina correctura saja necessaira.

Propostas per ina reforma

En vista a la situaziun preschentada ha formulà Santésuisse diversas propostas. Per distgargiar las chasadas pretenda Santésuisse correcturas davart la gulivaziun dals ristgs, sco per exempel resguardar meglier ils factors da morbiditad, vegliadetgna ed ils cas dad ospitalisaziun. Cun quella mesira vul Santésuisse rinforzar la solidaritad tranter persunas saunas e malsaunas e motivar las cassas da malsauns da promover models cun in provediment integrà. Plinavant propona Santésuisse in augment dals rabats per giuvenils tranter 19 e 25 onns ed ina finanziaziun pli ferma per famiglias cun uffants cun augmentar las contribuziuns dal maun public ed uschia la finala dispensar quels uffants da pajar premias a las cassas da malsauns.

Santésuisse ha dentant er fatg attent a la mancanza da mesiras efficacias per fragnar ils custs sco la libertad individuala da pretender prestaziuns medicinalas e l'obligaziun da contrahar cun mintga medi. In ulteriur problem saja da pudair eliminar prestaziuns betg necessarias sin donn e cust da las cassas da malsauns.



En media pajan las singulas chasadas 6,9% da lur entradas a las cassas da malsauns.

KEYSTONE